

# Objects raquentan historias

Ei dat ina sentupada da «mi-sa-pa» - mintgin sa participar. Tgi che vul (mo negin che sto) sa vegnir cun x-ina causa ch'ei per el ni ella zatgei special, mus-sar quella e raquintar pertgei che quei object ha ina muntada particulara.

## In battafug ni auter

Forsa vegn zatgi cun in svegliarin vegliander che s'udeva aunc alla basatta e raquenta zatgei da quella ch'ei morta gia dagitg - mo viva vinavon en las regurdientschas. Forsa vegn zatgi cun ina trofea dalla catscha. Da trofeas dat ei la finala bia historias! Historias ein daper-

tut ed objects animeschan nus da raquintar talas. Jeu sai buca aunc tgei object ch'jeu vegn a prender cun mei alla proxima sera «da cuminonza» a Ruschein. Forsa eis ei in battafug da Dupont cun las inizialas MC. Lu vegn jeu a raquintar co jeu sun vegnida avon varga 50 onns, sin in bastiment, tier quei object - malgrad ch'jeu mezza hai atgnamein mai fimau. Forsa prendel jeu era in pign pign guoter da plastic cun mei. Avon 20 onns era quel aunc pleins, pleins d'in liquid ch'ha per biars ina gronda muntada. Uss ei il guoter quasi vits, malgrad ch'jeu hai mai aviert el.

## Tgi che vul sa participar

Per ordinari envidein nus in ni plirs hosps a nossas seras «da cuminonza» e quels raquentan, seigi quei da lur lavur professiunala, da lur veta privata ni da lur enconuschientschas ed experienzas en connex cun in tema specific. Mintgaton, sco quella gada, dat ei a «da cuminonza» ina sera da «mi-sa-pa» - nua che mintgin e mintgina sa participar. Tenor quei «muster» havein nus gia giu pliras seras interessantas ed era legras ils davos onns. Inaga per exempel vein nus ris larmas da cuminonza cura ch'ina pintga gruppa ha entschiet spontana-

mein a saltar twist. Il tema da lezza sera era «ina dallas bialas» - melodias. In'otra gada da mi-sa-pa vein nus schau reviver «regurdientschas dalla scola» e cheu ein tazzas sil maun ch'ei deva da ducrina vegnidas endamen, ni parts da poesias mai emblidadas sco «Giachen Tin, in pur de vaglia». Marveglias tgei che vegn quella gada alla glisch e procura speronza per divertimento, reflexiun e cuort'uriala.

**«Objects raquentan historias». Margis, ils 3 da matg 2022 allas 20.15, Casa da scola Crestas, Ruschein. Dapli sin [www.dacuminonza.ch](http://www.dacuminonza.ch)**

*Per la gruppa d'interess, Maria Cadruvi*